

# INUIT ATAQATIGIIT

## Inatsisartuni



UKA 2017/90  
Nuuk, 25-09-2017  
Kelly Berthelsen

**Siunnersuut uunga: Kalaallit Nunaata Aatsitassarsiornermi Aningaasaateqarfia pillugu Inatsisartut Inatsisaata allangortinneqarnera pillugu Inatsisartut Inatsisaat nr. xx, xx. xxx 2017-imeersoq. (Aningaasaateqarfiup aningaasaataasa aamma aningaasaateqarfiup aningaasaataanit pissarsiat atorineqarnissaat, aningaasaateqarfiup aningaasaataasa taakkuningalu pissarsiat inissinneqarnissaat aamma aningaasaateqarfiup aqunneqarnera kiisalu allaffissornikkut ingerlatsineq allallu)**  
(Aningaasaqarnermut Akileraartarnermullu Naalakkersuisoq)

Aningaasaateqarfiup siunertaa, tassalu pisuussutit kinguaassanut iluaqutissanngorlugit ileqqaarneqarnissaat, aammalu namminersulernissatsinnut sillimmataanissaa Inuit Ataqatigiinniit suleqatigiiffigisimagatsigu suli pingaarteqaarput.

Pissutsilli nutaat maanna atulersimagatsigit siunertaq taannaagaluartoq arlalinnik isumaliutissaqarpugut. Aningaasaateqarfissuup pilersaarusiulerneqarnerata nalaani nunatta eqqaani uuliarujussuarmik nassaarnissaq assorsuaq isumalluarfigineqarpoq, isumalluarnerlu taanna naapertorlugu aningaasat amerlassusii aningaasaateqarfimmi aalajangersorneqarsimapput.

Assersuutigalugu, isertitat ukiuni tulleriinni 10 mio kr sinnertarsimagaangit aatsaat aningaasaateqarfimmut ikineqartassapput. Maannamut pisartut qiviarlugit aatsitassarsiorfiit anginngitsut ingerlanneqartillugit ukiumut pissarsiat qallukkat naapertorlugit akitsuusiisarnermi pisartut 10 mio. kr.-init appasinnerusartillugit taava aningaasaateqarfik immerneqassanngilaq naak aatsitassanit pissarsisaraluartugut.

Aamma, ingerlatseqatigiiffiit akileraarutaat aningaasaateqarfimmut isaatinneqartusartut naatsorsuutigineqanngillat naak aatsitassarsiorfinniit pissarsiat qallukkanit akitsuutinut - royaltinut - sanilliullugit amerlanersaat tassaasussaasut ingerlatseqatigiiffiit akileraarutaat. Taakku ilaat aamma aningaasaateqarfimmut nakkaatit-tariaqanngikkaluarnerpavut?

Kiisalu, aningaasaateqarfik aatsaat 1 milliard koruuninik imaqalerpat aatsaat sip-puutai erniortinniarsinnaalissavavut, soorlu nutaanik aatsitassarsiorfiliornermut

imaluunniit namminersornerput annerulersikkumallugu oqartussaaffinnik nutaanik tigusinermut.

Takorloorutsigulu aningasaateqarfik 800 mio. kr-inik imaqalereeraluartoq inui-aqatigiittut aningaasatigut ilungersunartorsiulissagutta taava aningaasaaterpassu-aqaraluarluta soriarsinnaanavianngilagut.

Taavalu, 1 milliard koruunit tungaannut ukiut qassit ingerlassappammita? Aatsitas-sarsiorfiit mikisuinnaappata immaqa ukiut 20-it ingerlaqqaassapput, taamalu kinguaariit ataatsit qarsutiinnarneqassapput iluaquserneqanngitsuissallutillu. Kinguaassavut pissaqartikkumanermik ullumikkut inuusut pilliutiginissaat eqqarsaa-taagunanngikkaluarpoq.

Ilaatigut apeqqutit tamakku sukumiinerusumik eqqartorneqarnissaat kissaatigigat-sigu siunnersuutip matuma ataatsimiititaliamut ingerlateqqinneqarnissaa matumuna Inuit Ataqtigiinniit inassutigissavarput.